

四庫全書

子部

欽定四庫全書

子部
冊府元龜卷八十六至八十八

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣徐步雲

謄錄監生臣張 恒

欽定四庫全書

冊府元龜卷八十六

宋 王欽若等 撰

帝王部

赦宥第五

唐玄宗開元二十七年二月己巳加尊號開元聖文神
武皇帝大赦天下制曰夫執大象建皇極者必藉彞訓
而受鴻名所以應乎天而順乎人也朕嗣守丕業二十
七年受命之初既膺明號尚多祗懼已謂崇高而公卿

宗子緇黃者艾披誠瀝懇詣闕上言僉以為乃聖乃文
祖宗大烈恭惟續服必在欽承願以休名施於薄德抑
而不許凡已十年爰迨於今又陳入請上追奉先之義
下稽從衆之言將從至公不可固拒以今日敬請大號
曰開元聖文武皇帝勉從典訓良增感懼惟新之號
既不私於朕躬非常之澤宜晉覃於率土大赦天下自
開元二十七年二月七日昧爽以前大辟罪已下罪無
輕重已發覺未發覺已結正未結正繫囚見徒常赦所

不免者咸赦除之自開元已來諸色應緣痕累人等咸從洗滌令許自新所司更不須以此為累其有別勅停官及亡官失爵者放歸不齒之類量加收叙左降官及諸色流人並稍量移近處朕每於黎甞常恐失所求其賑困乏必在及時比來諸州或有傷損處所請賑給例逼春農比及奏報又淹時月既無救於懸絕亦何成於惠養自今已後每年至秋收後即宜遣使分道宣慰仍與採訪使及州縣相知巡檢百姓間或有乏絕不自支

濟者應須蠲放及賑給便量事處置訖奏聞天下百姓
宜放今年地稅古者三載考績黜陟幽明允叶大猷以
勸天下諸道所通善狀但優仕進之輩與為選調之資
責實存名或乖古義自今日已後諸道更不須通善狀
每至三年朕當自擇使臣觀察風俗有清白政理著聞
者當別擇用宗廟致敬必先於如在神人所依無取於
非族深惟至理用切因心其應緣太廟五享於宗子及
嗣郡王中揀擇有德望者令攝三公行事其異姓官吏

不須令攝其草澤間有殊才異行文堪經國為衆所知
不求聞達者所繇州長官以禮徵送皇太子璵男及慶
王琮已下男宜並封授官邠王守禮寧王憲各與一子
三品官其内外文武官三品已上賜爵一級四品已下
各加一階長公主及嗣王郡王各與一子官郡主
縣主各放一子出身二王後及諸方蕃客宜各賜物諸
致仕官量與進改依前致仕天下侍老百歲已上版授
下州刺史婦人版授郡君賜粟五石綿帛五段九十已

上版授上州司馬婦人版授縣君賜粟三石綿帛三段
八十已上版授縣令婦人版授鄉君賜粟兩石綿帛兩
段京城父老等宜共賜物三千段僧尼等賜物一萬匹
天下寺觀每六齋日宜轉讀經典懲惡勸善以聞大教
率土之內賜酺三日

二十九年五月庚戌帝夢玄元皇帝告以休期畫真容
布告天下制曰道有三寶慈居一焉欽若至言爰茲宥
過天下見禁囚徒其十惡罪及造偽頭首并謀殺妖訛

宿宵人等特宜免死配流嶺南官人犯贓據情狀輕重
量事貶降餘一切放免且夫愛人之義長之育之務在
清淨合於簡易至於州縣造籍之年因團定戶皆據資
產以為升降其有小葺園廬粗致蓄積多相糾訐便被
加等朕情惟敦本義在勸農欲使野絕遊人國無曠土
安可得也自今歲已後且三五年間未須定戶其中或
有家資破散簡覆非虛則不可循舊差科量事與降今
者真容應見古所未聞福雖始於邦家慶宜均於士庶

其親王公主郡縣主内外文武官等並是賜錢至休假之辰宜以素食用申慶樂諸道節度使及將士等亦準此其兩京諸州父老亦量賜錢同此歡宴其錢以當處官物充伊爾公卿逮于黎獻宜勉崇玄化共復淳源宣布遐邇明知朕意

天寶元年正月丁未朔御勤政樓受朝賀大赦天下制曰古先哲王之致理也皆上順天心下稽人事時令贊發生之德靈符協紀年之稱考彼前載斯為大猷恭惟

烈祖玄元皇帝天寶賜慶象帝之先垂裕後人重光五
聖自朕嗣守丕業洎三十年寶賴宗祏降靈昊穹享祐
萬方無事六府惟脩寰宇晏如庶臻於理然則乾元在
上仁覆為德皇王臨下惠化攸先思弘善貸用廣慈育
遵道寶而建元暢玄風而不宰况屬陽和布氣獻歲發
生宜覃在宥之恩式降惟新之澤可大赦天下改開元
三十年為天寶元年正月一日昧爽已前大辟罪已下
罪無輕重已發覺未發覺已結正未結正繫囚見徒常

赦所不原者咸赦除之諸色左降官並流人未經量移者亦與量移陽春布和鳥獸孳育宜禁麇邱以遂生成自今已後每年春天下宜禁弋獵如聞百姓之內或有人戶高丁多苟為規避父母在乃別籍異居宜令州縣勘會其一家之中有十丁已上者放兩丁征行賦後五丁已上放一丁即令同籍共居以敦風化天下侍老八十已上者宜委州縣官每加存問仍量賜粟帛侍丁者令其養老孝假者矜其在喪比者王政優容俾申情理

而官吏不依令式多雜役使自今已後不得更然國之
急務莫若求才頃者數遣搜揚士庶尚慮遺逸更宜精
訪以副虛懷其前資及白身人中有儒學博通及文詞
秀逸或有軍謀越衆或有武藝絕倫者委所在長官具
以名薦若乃弘我風化實惟方岳必佇其人以膺共理
其京文武官五品已上清資並郎官據資歷人才堪為
刺史者各人封狀自舉但文宣垂訓事必正名而黃鉞
古來以金為飾金者應五行之數有肅殺之威去金稱

黃理或未當其黃鉞宜改為金鉞副武威之義焉內外文武官九品已上各賜勲兩轉前王重典在乎祭祀况屬惟新事宜昭告五嶽四瀆名山大川諸靈迹及自古帝王忠臣義士並令所繇州縣致祭

二月丙申合祭天地於南郊制天下囚徒罪無輕重並放免流人移近處左降官依資叙用身死貶處者量加追贈文武官三品已上加一爵四品已下加一階

三載正月丙申朔御含元殿受朝賀下制曰履端正名

義取垂範體元設教在乎變通雖沿革從宜罔不稽古
朕纘復興運恭守睿圖嘗恐至化猶微淳風尚薄未能
臻華胥之俗登可封之人故未明求衣日昃忘食厲精
為理思致雖和歷觀載籍詳求前制而唐虞之際煥乎
可述用是欽若舊典以協惟新可改天寶三年為載今
春事將興陽和布澤發號施令之日革故履新之時宜
弘在宥之恩以助生成之化其天下見禁囚徒應雜犯
罪死者宜各降一等自餘一切放免其十惡及造偽妖

妄頭首官吏犯贓並姦盜等害政既深情難容恕不在
免限凡諸郡縣仍令太守縣令勸課農桑其先處分太
守縣令在任有增減戶口成分者所繇司量為殿最自
今已後太守縣令兼能勾當租庸每載加數成分者特
賜以中上考如三載之內皆成分所司錄奏超資與處
分其丁戶仍須案實不得取虛挂之名使新鄰代納受
其艱弊凡在黎獻實資存恤一失生業則流庸不歸每
軫於懷深可矜憫諸色當蓄人應送資課者當郡具申

尚書省勾覆如身至上處勿更抑令納資致使往來辛
苦從閏二月至六月已來其當上入中有單貧老弱者
委郡縣長官與所繇計會便放營農諸軍征鎮及有尪
羸疾病者委節度使速擇放還中外庶僚勉修其職各
副朕意宣布遐邇咸使知聞

三月壬申制曰王者法天惠人順時行令是惟舊典用
致和平朕臨御萬邦於茲三紀宵衣旰食思弘至化尚
恐天下郡縣囹圄滯留不即疏決以傷和氣今三農在

時宜助生育庶覃寬宥之澤以協上玄之心其天下見
禁囚徒應合死配流嶺南流已下罪并見徒一切放免
其責保在外及追捉未獲者並同見禁例處分其京城
內宜令中書門下即分往疏決應合流人便配訖聞奏
其東京及北京兼諸郡各委所繇長官準此處分即宣
示中外咸使知聞

十二月癸丑親祠九宮貴神於東郊禮畢大赦天下制
曰九宮嚴祀百代莫修豈日給之不暇將明靈之有待

朕當宸君臨握圖續業每聽政中是疇咨讜言觀書乙
夜以求擴實勵精為理三紀於茲上荷宗廟延祥克開
厥後下賴股肱協德以致雖熙而鱗鳳龜龍近遊郊藪
蠻夷戎狄遠輸琛貢乘時來之休運恢皇王之遠圖是
以圜丘方澤之儀升中告類之禮無典不舉靡神不懷
恭惟九宮明祠尚闕載深兢惕用建靈壇爰以元辰親
執奠獻協青春發生之慶祈黔庶啟佑之福今至誠式
展大禮云備瑞景和風神心如荅無疆之祉豈獨在予

非常之澤宜覃率土可大赦天下自天寶三載十二月二十五日昧爽已前大辟罪已下罪無輕重已發覺未發覺已結正未結正繫囚見徒並赦除之其十惡死罪造偽頭首謀殺攻劫及官典犯賊不在此限朕深惟善政實在養人作法務從於寬簡任事必量於齒力比者成童之歲即挂輕徭既冠之年便當正役憫其勞苦用軫於懷自今已後天下百姓宜以十八已上為中男二十三已上成丁每載庸調八月徵收農功未畢恐難濟

辦自今已後延至九月三十日為限諸軍行人遠為邊
扞修短之分雖有定期從役而終良深軫念其陣亡及
在軍亡歿骸骨尚未還貫者宜令節度使給其棺櫬速
歸本鄉其家內無人付親收葬仍令所繇郡縣量事優
恤使得濟辦自古聖王皆以孝理五常之命百行莫先
移於國而為忠事於長而為順永言要道孝行過人鄉
閭欽伏者宜令所繇州郡長官具以名薦其有父母見
在別籍異居虧損名教莫斯為甚親歿之後亦不得分

拆自今已後如有不孝不恭傷財敗產者宜配隸磧西
用清風教朕惟熙庶績博訪逸人豈惟振拔罪淹以期
於大用亦欲褒崇高尚將敦於薄俗虛佇之懷蓋若於
此其有高蹈不仕遁跡丘園為遠近所知未經薦舉者
委所在長官以禮徵送又崇德追遠式閭封墓用旌前
烈以協大猷自古聖帝明王名臣烈士陵墓有頽壞者
宜令管內量事修葺仍明立標記禁其樵採天下侍老
百歲已上賜綿帛五段粟三石八十已上三段粟兩石

仍令郡縣長官存問給付亞獻太子亨宜賜物二千疋
終獻慶王琮一千疋正衣夾侍各五百疋親王三百疋
新封建郡王及國公一百疋賢妃三百疋長公主各三
百疋公主各二百疋嗣郡王各一百疋中書門下三品
竭心翊戴弘益實多各與一子官如先已授官量與一
人改轉内外文武三品已上賜爵一級四品已下各與
一階一品賜物七十疋三品已上六十疋五品已上賜
物四十疋六品已上二十疋諸道節度使各賜物一百

足三京留守及二王後各八十足採訪使各六十足諸蕃客共賜二千足其唐元功臣締構之初竭其忠款欽功念舊情所不忘普恩之外更加一階其身歿者各贈一官皇親五等已上及九廟子孫諸親三等已上未出身者與一子出身其前資者選日稍優與處分見任者更賜勳兩轉應天下賜酺三日

六載正月戊子有事於南郊禮畢下制曰昭事昊穹必惟殷祀蓋順帝則而成政也肅雍清廟必惟嚴享蓋繼

先志而為孝也則累聖之德在人元陽之和在候思所以達明靈之景貺迪皇王之大猷者矣朕夕惕宵衣奉天績業勉思政道惟懷永圖賴百辟庶官輔予不逮聲朔無遠車書靡殊加以乾符坤珍日來月往感福應之尤盛懼明祠之未殷且資父事天因親設教公情以達禮廣敬以推尊時享之誠寧宜異數日舉之饋豈忘事生是以疇咨故典率循新禮對越上靈聿追嚴配既而宗牙宿設明德惟馨敬爾臣工駿奔執豆陟降至止樂

編禮成精意上協神休下答宜廣維祺之福以覃作解
之恩其天下見禁囚徒除十惡死罪及官典犯贓自餘
一切赦免自天寶元年已前流人及配隸効力左降官
非反逆緣坐其並量移近處其中有年齒衰暮情可哀
矜者仍聽致仕朕承大道之訓務好生之德施令約法
以去極刑議罪執文猶存舊目既措而不用亦惡聞其
名自今已後斷絞斬刑者宜除削此條仍令法官約近
例詳定處分三皇五帝道冠開闢創物垂範功濟生靈

繼天之德在墳典而昭著勤人之祀於禮文而尚闕永
言龜鏡宜示欽崇其三皇宜置一廟五帝亦置一廟即
令所司卜擇吉地營建仍以時致祭其廟令太常寺檢
校諸廟之主禮有遵於合祭同等則祔義亦取於旁通
惠宣等太子雖官為立廟比來子孫自祭或時物有闕
禮儀不備興言及此良用憮然宜與隱太子及懿德太
子列次諸室擇揀一寬處同為廟一應祭祀及樂饌等
並令官供每差祭官宜依常式仍都置廟官及丞等自

餘所廢廟官等並宜減省奠獻既昭感恩增遠恭惟陰教以集禎祥自獻祖宣莊皇后張氏已下祖父未有贈官及一房子孫沉翳所司即以名聞將展褒崇以申追慕王業之功羣才佐命中興之後元宰協心且配食廟庭必重勲德循名冊府尚有關遺緬懷茂功用增禮典自今已後大廟配享功臣高祖室宜加裴寂劉文静太宗室加長孫無忌李靖杜如晦高宗室加褚遂良高季輔劉文軌中宗室加狄仁傑魏元忠王同皎文武之道

既惟並用宗敬之義不可獨闕其鄉貢武舉人上省先
令謁太公廟每拜大將及行師克捷亦宜告獻今勝殘
在運無事為心顧此朝儀當符至理既時非盱食將至
升平而廷設殺刑何成在宥其每日立仗食設杖鉞等
並宜停廢立身揚名所以廣孝流根自業亦在推恩既
切因親之心須開議事之制其內外文武官五品已上
官父祖無資蔭者其所蔭宜同子孫用蔭之例五服之
紀宜所跂及三年之數以報免懷齊斬之殊雖存出母

之制顧復之慕何申孝子之心其出嫁母宜終服三載
祭祀之典犧牲所備將有達於虔誠蓋不資於廣殺况
牛之為畜人實有賴既功施播種亦力被於車輿此比
餘生尤可矜憫但前聖有作難為盡廢明神克享亦在
深仁自今已後每大祭祀應用騂犢宜令所司量減其
數仍永為常式崇我祖訓其惟道門將以福助生靈弘
拯天下諸觀道士等如聞人數全少修行多闕其欠少
人處宜度滿七人並取三十已上灼然有道行經業者

充仍令所繇長官精加試練採訪使重覆勿使踰濫度
訖挾名奏聞其諸觀有絕無人處亦量度三兩人準此
簡試選賢擇能嘗慮不廣三府之辟則唯採於大名四
科之薦蓋不通於小學今承平既久仕進多端必欲遠
賁弓旌載空巖穴片善必錄末技無遺天下諸色人中
通明一藝已上各任薦舉仍委所在郡縣長官精加試
練灼然超絕流輩遠近所推者具名送省仍委尚書及
左右丞諸司委御史中丞更加對試務取名實相副一

時奏聞四瀆五嶽雖差秩序與雲播潤蓋同利物崇號所及錫命宜均其五嶽既已封王四瀆當升公位遞從加等以答靈心其河瀆宜封靈源公濟瀆封清源公江瀆封廣源公淮瀆封長源公仍令所司擇日差使告祭自古聖帝明王忠臣烈士陵墓有頽毀者先令修葺并禁樵採歲月深久摧壞或多宜令所繇郡縣申明前勅處分並五嶽及諸名山大川並令所在長官致祭諸郡義倉本防水旱如聞多有費損妄作破除自今已後每

郡差一上佐專知除賑給百姓之外更不得輒將雜用
天下百姓今載應損郡逋租懸調諸色勾徵變換等物
及諸延限者並宜一切放免征行之家每令存恤差科
之際或未優矜自今已後並準飛騎例蠲免天下侍老
百歲已上賜綿帛五段粟三石八十已上綿帛三段粟
二石仍令所在長官存問各即分付亞獻太子亨賜物
二千疋終獻慶王琮賜物一千疋京文武官各賜帛有
差天下賜酺三日

七載五月壬午冊尊號畢御勤政樓大赦天下制曰惟
天法道惟后奉天既合德以降符必執象以明本則上
玄眷命有以丕承大寶鴻名斯為公義朕續宗社之重
揚文武之烈克勤匪懈服道齊心允迪玄猷聿求至理
日慎一日三紀於茲矣區夏大寧靈祇集貺而公卿宗
子耆艾法流僉曰玉芝白魚神言瑞景天之應也敦信
興禮務本崇儒人之應也化洽而風俗還淳氣和而疵
癘不作天啟道運其何讓焉上答元符願增徽號披誠

詣闕累上封章至請愈勤懇詞難奪以今日敬膺典冊
曰開元天寶聖文神武應道皇帝式副人神感懼交集
宜廣恩於善儉俾協慶於惟新可大赦天下自天寶七
載五月三十日昧爽已前大辟罪已下罪無輕重已發
覺未發覺已結正未結正繫囚見徒當赦除之其左降
官及流移配隸安置罰鎮効力之數並稍與量移亡官
失爵放歸不齒及諸色被停與替非衰老疾病者宜令
所司量加收叙人和年登休運斯屬輕徭省賦惠政攸

先將洽小康必弘厚儉其天下百姓來載租庸並宜放
免及諸色勾徵等亦一切放免自古帝王建邦受命必
敬先代以循舊章周備禮文既存三恪之位漢從損益
唯立二王之後自茲已降且復因循將廣繼絕之恩式
弘復古之道宜於後魏子孫中簡擇譜屬灼然相承者
一人委所司勘責準鄴公例定為三恪陵廟所奏典職
惟崇事雖更於有司任豈循於常秩其宗正卿宜與太
常卿同品其少卿及丞亦宜準此又上古之君存諸號

氏雖事先書契而道著皇王緬懷厥初寧忘咸秩其三
皇已前帝王宜於京城共置一廟仍與三皇五帝廟相
近以時致祭自古受命之主創業之君皆經濟艱難戡
定禍亂雖道謝於往古乃功施於生人用率典章亦從
裡祀其歷代帝王肇迹之處未有祠宇者宜令所繇郡
縣量置一廟以時享祭仍取當時將相德業可稱者三
人配祭仍並圖畫立像如先有祠宇霑享祭者亦宜準
此式間表墓追賢紀善事有勸於當時義無隔於異代

其忠臣義士孝婦烈女史籍所載德行彌高者所在亦置一祠宇量事致祭古者鄉有塾黨有庠所以明尊卑之義正長幼之序風化之道義在於茲先置鄉學務令敦勸如聞郡縣之間不時訓誘閭巷之內多虧禮節致使言詞鄙褻少長相凌有黷清猷何成雅俗自今已後宜令郡縣長官申明條式切加訓道如有禮義興行及紀綱不立者委採訪使明為褒貶具狀聞奏道教之設淳化之源必在弘闡以敦風俗項列四經之科將冠九

流之道雖及門求進頗有其人而覩真窮微罕聞達者
豈專精難就為勸獎未弘天下諸色人等有通道德經
及南華等四經任於所在自舉各委長官考試申送其
崇玄館生自今已後每至選日宜減於常例次為留放
朕每以道元有屬思竭精誠經教所在豈忘崇奉且宗
其道者師其人行其道者尊其禮晉琅琊王公府舍人
楊真人護軍長史許真人丹陽上計掾許真人皆道著
妙門感通玄闕降高真之迹為上清之宗後漢張天師

教達元和德宗太一正一之道幽贊生靈梁中散大夫
貞白陶先生高尚塵表博達玄微綜輯真經傳授後學
並令有司審定子孫將有封植以隆真嗣天師冊為太
師貞白冊贈太保其洞宮山各置壇祠宇每處度道士
五人並取近山三十戶蠲免租稅差科永供灑掃諸郡
有自古得道昇仙之處雖先令醮祭循慮未周宜每處
度道士二人其靈迹殊尤功應遠大者度三人永修香
火其茅山紫陽觀取側近二百戶太平崇元二觀各一

百戶並蠲免租稅差科長充修葺灑掃應天下靈山仙
迹並宜禁斷樵採弋獵如聞山林學道之士毋被搜括
且法之防邪本有所以至於宿宵妖訛亡命聚衆誘陷
愚人故令禁斷郡縣遂一槩迫逐使志道之士不得安
居自今已後審係清潔更不得恐動以廢修行其五嶽
四瀆名山大川各令本郡長官致祭朕刻意直經虔誠
至道冀憑玄祐永錫黔黎每朝禮三清則宵衣忘寢或
齋戒一室則蔬食精專不以勤躬為倦務以徇物為心

况於宰殺尤加惻隱自今已後每月十齋日不得輒有宰殺又閭閻之間例有私社皆殺生命以資宴集仁者之心有所不忍永宜禁斷且因親設教式本於人倫自葉流根必逮於榮養内外文武職掌官有五品已上其父老見在無官者宜授各一官仍令致仕其祖母見在準母例處分京官五品已下正員如父母已沒未有官者宜追贈所司勘會即與處分睦親之義因心不忘前開府儀同三司竇瑊頃以容納徵人頗虧憲典永懷舅

氏追感涓陽宜申國恩再復榮秩可開府儀同三司仍
放優閒不須朝會王澤無私豈殊於中外天瑞有慶頻
屬於京輦寬大之典則以博覃施惠之恩特申曲被其
京城父老宜各賜物十段七十已上仍版授本縣令其
妻版授縣君六十已上版授本縣丞天下侍老百歲已
下版授下郡太守婦女版授郡君九十已上版授上郡
司馬婦人版授縣君八十已上版授縣令婦人版授鄉
君仍並即量賜酒麪內外見任文武官九品已上宜各

賜勲兩轉其京文武官見在京及致仕並陪位官諸方
通表使及月番官等一品賜物一百疋二品三品八十
疋四品五品五十疋六品七品三十疋八品九品二十
疋兩京留守各八十疋其節度採訪使並諸充官使未
回者並同在京例賜物貴妃楊氏稟性柔和因心忠孝
克慎閨壺蹈禮循詩加以勤志玄宗協誠舉奉率勵宮
掖以迪闕睢宜賜物三千疋嬪御等賜物有差其大真
觀雖已度人住持尚少宜更度道士七人太子亨宜更

賜物二千足慶王琮已下各賜物有差率土之內賜酺
三日

八載閏六月丁卯羣臣上尊號帝御含元殿受冊禮畢
大赦天下制曰自昔皇王受命必降於元符天人協心
乃彰於大號朕纘承玄緒虔奉睿圖何嘗不精意真宗
專心庶政幸以方隅底定風雨時若人和歲稔且洽於
時雍極瑞殊祥荐臻於昭應故得玉芝再產秘牒玄通
至道降休先聖儲祉顧惟菲德曷以克當是以祗薦崇

名永揚洪烈郡公百辟授義比事誠請不已固辭不獲以今日敬膺典禮曰開元天地大寶聖文神武應道皇帝徽章載茂寅畏增添宜因稽古之典式布惟新之澤可大赦天下自天寶八載閏六月五日昧爽已前大辟罪已下罪無輕重已發覺未發覺已結正未結正繫囚見徒常赦所不免者咸赦除之朕永惟風教漸冀還淳至於弘貸之名亦思復古其天下百姓丈夫戶頭者宜各賜爵一級征鎮之役其來久矣雖存素備諒在變通

頃者用兵蓋非獲已今西戎摧殄北虜歸降南蠻東夷咸來稽顙亦可謂四海無事萬里廓清減戍息人思弘善貸其軍鎮兵非切要可均減者宜令本鎮節度使與所司商量處置奏聞其百姓有頻鎮經戍者已後差點之次不在此限高年給復義存養老因時定式務廣仁恩其天下百姓丈夫七十五以上婦人七十以上宜各給一人充侍仍自揀擇至八十已上依常式處分唐虞省刑畫冠不犯秦漢制法密網維煩理亂之源得失斯

在朕常想淳古務崇敦朴刑期不濫政協無為豈惟守
於升平庶有臻於大道頃者詳諸條目已從推究至於
結斷尚慮深刻所貴從寬示其知禁宜令中書門下與
刑部大理寺法官審更詳定法律之間有所不便者具
條目聞奏禘祫之禮以存序位質文之變蓋取隨時國
家系本仙宗業承聖祖重熙累盛既錫無疆之休合享
祭神思弘不易之典自今已後每遇禘祫並於太清宮
聖祖前設位序正上以明陟配之禮欽若玄宗下以盡

虔恭之誠無違至道比來每緣禘祫時廢時享事雖適
於從宜理或虧於必備已後每緣禘祫其嘗享無廢又
奉先追遠禮惟昭後崇福展敬義在因心自今已後獻
祖宣皇帝宣莊光皇帝光懿皇后忌日宜令京城一日
設齋太祖景皇帝景烈皇后代祖元皇帝元貞皇后忌
日京城三日行道玄宗妙本實脩微言垂範傳策將弘
至化朕所以發求道之使遠令搜訪因聽政之餘親加
尋繹既判訛謬爰至簡編必闡揚以敷風教今內出一

切道經宜令崇玄館即繕寫分送諸道採訪使令管內諸郡轉寫其官本便留採訪郡一大觀持誦聖人垂訓蓋先於道學者宗本必有其師文宣王與聖祖同時俱為教首雖考言比德理在難名而問禮叙經跡彰親授思廣在三之義用崇得一之尊宜於太微宮聖祖前更立文宣王遺像與四真人列侍左右且道降真符天有成命藏之於密則取固名山彰之以類則發祥星洞况靈仙所集宜表殊真太白山可封為神應公所繇四時

祭祀其金星洞改為嘉祥洞所管華陽縣仍置一祠宇
仙人臺下置一觀兩京并十道於一大郡亦宜置一觀
並以真符玉芝為名每觀度道士七人修持香火戶部
侍郎兼御史中丞王鉷以才授委以忠奉上頃命精求
玄記克協神心宜旌迺誠俾正章綬特與三品其李渾
等三人既親傳真誥因獲元符當有甄明用旌福應宜
令中書門下量其所能具狀聞奏當別處分又九州之
鎮實著禮經三代之典必宗望秩事既屬於報功義有

符於錫命其九州鎮山除入諸嶽外並宜封公仍各置
祠宇先已有祠宇者量更增修儲慶發祥當申昭報宜
令所在長官各陳祭禮名山大川亦量事致祭天下侍
老並量賜爵一級四品已上加一階其京文武官在京
及諸色陪位官通表使等賜帛有差率土之內賜酺三
日

十載正月甲午有事於南郊大赦天下制曰皇天眷命
必順於五行哲后馭時實遵於三統考古之道何莫繇

斯朕欽若上玄嗣守丕業察璿衡以齊政念稼穡以勸
人日慎一日四十載於茲矣何嘗不夙夜祇畏憂勞在
懷思致黎元臻夫至理幸以刑清俗阜天成地平萬方
底寧羣物咸遂雖慙大化且謂小康此皆至道儲祉宗
社敷祐豈予菲薄而克致焉然則上稽歷象傍採輿議
爰以土位承漢火行是憑大易之辭用紹前王之烈禎
祥累應正閏攸分不改舊章惟新景運屬獻歲初吉乘
時布和是用展祀崇禮竭誠昭報庶協發生之序載覃

雷雨之澤可大赦天下自天寶十載正月十一日昧爽已前大辟罪已下罪無輕重已發覺未發覺已結正未結正繫囚見徒常赦所不免者咸赦除之其左降官及流移配隸安置罰鎮効力之類並稍量移近處其官已覆資至叙用之日不須為累其流人配隸并一家往者所犯人情非切害身已亡歿其家口放還流人及左降官考滿載滿丁憂服滿者亦準例稍與量移其亡官失爵放還不齒其諸色放停解考免與替人等非犯贓者

宜令所司勘責量加收叙其衰老疾病者仍與致仕官
天下百姓今載地租并諸色勾徵欠負等色在百姓腹
內未納者並一切放免且京兆府及三輔三郡百役殷
繁自今已後應差防丁屯丁宜令所繇支出別郡禮者
所以訓導人俗昭事明祇所宜增修以會其本況國之
大典在於精裡必資備禮以彰遵奉自今已後設祭南
郊薦獻太清薦享太廟其太尉行事前一日於致齋所
具羽儀鹵簿公服引入朕親授祝版乃赴清齋用展誠

敬夫孝子奉親極敬惟愛歿有思戚霜露之感愈深祭以嚴恭烝嘗之敬如在且廟者貌也取像存焉是禮繇於情因心則感太廟宜置內官以備嚴奉仍於廟外別造一院安置庶申罔極之思無忘事生之禮嶽瀆山川蘊靈毓粹雲雨之澤利及生人春秋之義存乎祀典况正其運序式遵咸秩其五嶽四瀆及諸鎮山宜令專使分往置祭其名山大川及諸靈迹并自古帝王及得道昇仙忠臣義士孝婦烈女有祠廟者各令郡縣長官逐

便致祭其有陵墓屋宇頽毀者量事修葺合應禁樵採
宜申明四海攸廣百川朝宗德乃靈長道惟善利永言
澤潤義在封崇其四海宜並封王仍差使備禮冊祭每
順時行令奉道施法天心不違靈鑑不遠且去載長至
庚子御辰今茲建元辛卯應歷立春乃標於歲首上巳
更協於清明此氣序和調乾坤交泰既正東方之位咸
歸啟運之祥則政貴弘通上符天意况法以輔德刑以
閉邪豈在煩苛必資簡易朕永懷至理思至還淳每懷

哀矜之心屢申寬大之詔實欲人皆知禁化洽無為頃者已令法官每刊刑典夫共理親人在於郡守縣令今二千石朝廷精擇得其人縣令委之選司慮未盡善孰若連職同官見有踪跡宜令天下太守各舉堪任縣令一人善惡賞罰必及所舉所司仍明作條例每搜羅賢俊旌賁丘園猶慮遁跡藏名安卑守位瞻言及此寤寐思焉其諸色人中有懷才抱器未經薦舉者委在長官審訪具名錄奏禮之王制垂範作程亦既觀德訓人孝

敬故天子七廟諸侯五廟大夫三廟士一廟孝享奉先亦各有辨今三品已上乃許立廟永言廣敬載感於懷其京官上員四品清望官及四品五品清官並許立私廟京官五品已上正員清資官階相當並五品已上正員外清官父母先亡歿無官號者並與追贈又父有封爵合傳授子孫或緣申請遲違準式遂停承襲如有此色自開元以來宜令所司審加勘責灼然合襲者特宜許襲天下侍老百歲已上賜綿帛五段粟五石八十已

上綿帛三段粟三石丈夫七十五已上婦人七十已上
綿帛二段粟兩石大清真宮道士各賜物三十段陪位道
士共賜五百段亞獻太子賜物二千疋終獻榮王琬賜
物一千段文武百官及有職掌各賜帛有差率土之內
賜酺三日

十三載二月甲戌御興慶殿受冊尊號為開元天地大
寶聖文神武證道孝德皇帝禮畢御勤政樓大赦天下
制曰王者事天明事地察修身慎行孝德彰矣故風化

天下和睦興焉致敬宗廟祖考來格是則禮莫大於嚴
享孝莫大於揚名有以通於神明有以廣於四海朕承
真之道續聖之業欽若先訓惟懷永圖寶儉寶慈無為
而理自南自北有截來威五教聿興家服仁孝四靈咸
盛物應純誠百郡公卿萬方夷夏僉奉玄貺徵長發於
真源屢薦鴻名願昭彰於至德封章守闕於再於三加
以聖祖錫符玄中啟迪天心垂裕榮光降臨敢不丕承
固執冲讓乃展因心之義以弘推尊之典虔上册禮齋

肅思誠入室優然敢忘於日出戶而聽庶幾有聞揚美
謚於無疆展永懷於罔極且敬從拜後禮既尊先式副
羣心以允成義以今日敬膺典冊曰開元天地大寶聖
文神武證道孝德皇帝大號載崇祇若增懼宜因布和
之序式弘在宥之澤可大赦天下自天寶十三載二月
九日昧爽已前大辟罪已下罪無輕重已發覺未發覺
已結正未結正繫囚見徒常赦所不免者咸赦除之官
人犯入已贓不可更令却上後不須為累其左降官並

稍量移近處反逆緣坐流配之色宜與量移其王鉞李
林甫柴崇躍阿布思等並寄任非輕苞藏特甚原情議
法深所難容况日月未淹罪坐尤重即從寬宥何以懲
肅應緣親累流配者並不在該及之限左降官祿前遭
憂皆不得離任孝行之道所未弘通情理之間深可哀
恤如有此類宜並放歸仍申省計至服滿之日準法處
分自今已後編入嘗式其中有非反逆緣坐及情理切
害有父母年老不任相隨無昆弟養者許停官歸侍及

有身已衰老久懼譴責願停官者委本道採訪使簡擇具名牒中書門下然後放還鰥寡惇獨之絕者量加賑給三載黜陟百王令典殿最之迹庶問攸歸欲更別遣使臣慮有煩擾今載宜委本道採訪使具官人善惡奏聞以申勸阻自臨御以來四十餘年棧樸延想寤寐求賢林藪無遺旌招不絕猶慮升平已久策業增多至於徵求或遺僻陋其博通墳典洞曉玄經清白著聞詞藻宏麗軍謀出衆武藝絕人者任於所在自舉仍委郡縣

長官精加銓擇必取才實相副者奏聞朕尊榮先謚霜
露增感於以孝思無忘錫類其內外見任官階俱是三
品已上父未有五品官及無官已亡歿者宜各贈五品
官及母無邑號者亦與追贈其見任四品五品清官官
階俱是五品已上者亡父母先無官號亦準此追贈且
厚其風俗五教之旨聿興賁於丘園十翼之風斯在其
士庶間衆推孝弟異代義居高尚確然隱遁巖穴者委
採訪使博訪聞薦其孝義之人已經旌表雍睦無易純

至有終著美鄉閭深可嘉尚各賜勲兩轉以彰德行天
下侍老百歲已上版授本郡太守婦人版授郡夫人各
賜綿帛五段粟三石八十已上版授本縣令婦人版授
縣君各賜綿帛兩段粟兩石大清真宮闕聖祖仙居頻降
休徵屢貽啟迪不有優異豈表殊常其本宮道士宜各
賜物三十段道門威儀王虛真賜物五十段陪位大德
各賜物二十段因心推崇增山美謚惟官統職必在正
名今以大常尊事宗廟安可別署為名禮不逼尊情期

達敬五陵署改為臺其獻陵臺等五令及丞并升一階以彰崇奉五嶽四瀆及名山大川并靈迹之處先賢祠廟各委郡縣長官致祭其有陵墓祠宇頽壞者量情修葺亞獻皇太子亨賜一千段終獻榮王琬賜物五百段其餘各賜階爵有差其郡守縣令職在親人必務公勤以康黎庶凡所推擇皆竭乃誠寵錫之間須甄異等普恩之外太守等並賜爵一級縣令賜勳兩轉庶期勉勵以表朕心其京文武官一品賜物一百疋二品八十疋

三品七十疋四品五品五十疋六品七品各三十疋八品九品各二十疋北京留守節度採訪使並京官準勅出使未迴者所賜物並同見在例左相陳希烈純粹之道載穆朝廷大儒之風式瞻師表且協和時令翊贊升平柔嘉其德克壯元老與一子五品官賜物五百疋攝太尉真瓚上冊書寶冊讀冊右相楊國忠當朝正色百僚綱紀庶節遺身三階柱石况發揮孝理潤色鴻猷金玉王廷典禮增緝不有殊等何用為勸宜與一子三品

官仍與一子五品官更賜物五百段左僕射安祿山以
真一之心揔文武之任出清北路入贊南宮既押登歌
又揮寶冊與一子官更賜物四百疋攝太尉張均太清
宮祠及修儀注等使普恩之外又賜物一百疋武德功
臣及貞觀初宰輔等緬想忠義感會風雲用集大勲肇
興王業其有子孫零落冠冕陵夷無任官宦者宜令所
司勘責依資與一人京官唐元勲臣績叅締構錄勞念
舊每寘於懷普恩之外宜放一子出身如已出身所司

依資與一官率土之內賜酺三日

十四載八月辛卯是月天長節上御勤政樓宴羣臣下
制曰朕臨馭萬邦迨今四紀曷嘗不虔誠至道銳心庶
政昊穹享祐俗致升平仁壽之域漸登太和之風斯在
比歲小有僭亢頗非豐稔遂使開倉賑乏空固恤刑兼
蠲徭省賦故得家給人足頃者農功正興而霑澤頻阻
言念黎獻匪遑底寧是用發於精誠庶乎昭鑒至誠上
達膏雨應期俾夏苗如雲秋穫不日周覽原野宛同茨

梁豈惟有慰朕懷實亦克符人慶此皆上玄垂貺宗社
降靈豈曰朕躬所能通感屬天長令節盛德在金爰因
歡慶之辰用申雷雨之澤其天下見禁囚徒有犯十惡
及謀殺偽造頭首罪至死者特宜免死配流嶺南遠惡
處自餘一切釋放故聖人積不涸之泉王者用無窮之
府支計苟足多賦何為天下百姓今載租庸並宜放半
所運糧儲本資國用大倉今既餘羨江淮轉輸艱勞務
在從宜何必舊數其來載水運入京宜並停如聞天下

諸郡逃戶有田宅產業妄被人破除並緣欠負租庸親
隣貨賣及其歸復無所依投永言此流須加安輯應復
業者宜並給還縱已代出租庸不在徵陪之限書云咸
秩羣望詩曰懷柔百神永惟明徵豈忘昭報今秋稼穡
頗勝常年實賴靈祇福臻稔歲其五嶽四瀆所在山川
及得道升仙靈迹之處宜委郡縣長官至秋後各令醮
祭務崇嚴潔式展誠享無廣屠宰以備牲牢其天下侍
老宜各量賜米麥又親人之要令長為重比雖精選未

盡徵求卓魯之才或遺蒲密之化安寄宜令京官五品
已上正員文官三品已上正員武官及郎中御史各舉
堪任縣令一人具名申省委有司試擇奏授其有善惡
賞罰與舉主並同僚作期限一時令集王制下士視上
農周政庶士陪祿若衣食既足則庶耻乃知至於資用
靡克或貪求不已敗名冒法實此之繇輦轂之下尤難
取給其在兩京文武九品已上正員既親於職務可謂
勤心自今已後每月給俸食雜用防閣庶僕等宜十分

為率加二分其同正員官加一分仍永為常式其南衙九品已上并京兆府畿令等宜共賜物二萬疋左右龍武軍各賜一千疋其唐元功臣念言勲舊宜異常倫兩軍各賜物二千疋餘各有差庶生成之澤自葉而流根慶賞之恩繇表以暢物宜宣示遐邇知朕意焉

十五載八月庚辰玄宗至蜀郡癸未大赦天下制曰朕以薄德嗣守神器何嘗不乾乾惕勵勤念蒼生至於水旱或愆則禱祠請罪邊鄙微擾則齋戒思過聿來四紀

人亦小康蓋祖宗之靈卿大夫之助也是以推心將相
不疑於物而奸臣克黨負信背恩創剝我黎元暴亂我
函夏皆朕不明之過豈復尤人哉楊國忠厚歛害時已
肆諸原野安祿山亂常構禍尚逋其斧鉞朕用巡巴蜀
訓勵師徒命元子北畧朔方諸王分守重鎮合其兵勢
以定中原將盪滌煩苛大革前弊思與億兆約法惟新
上以奉宗廟神祇下以寧華夷動植可大赦天下其天
寶十五載八月一日昧爽已前大辟罪已下常赦所不

免者咸赦除之自兵興已來有破家者一切與雪流入
一切放還左降官各還舊資內外文武官節級賜階爵
安祿山脅從官有能改過自新背逆歸順並原其罪優
與官賞

冊府元龜卷八十六

欽定四庫全書

冊府元龜卷八十七

宋 王欽若等撰

帝王部

赦宥第六

唐肅宗至德元年七月甲子即位於靈武御南門下詔
曰朕聞聖人畏天命者奉天時知皇靈眷命不敢違而
去之知厯數有歸不獲已而當之在昔帝王靡不繇斯
而有天下者也乃者羯胡亂常京闕失守天未悔禍羣

兇尚扇聖皇久厭天位思傳眇身軍興之初已有成命
予恐不德固敢祇承今羣公卿士僉曰孝莫大於繼德
功莫大於中興朕所以理兵朔方將殄寇逆務以大者
本其孝乎須安兆庶之心敬順羣臣之請乃以七月癸
丑朔十二日甲子即皇帝位於靈州崇徽號上尊聖皇
曰上皇天帝所司擇日昭告於上帝朕以薄德謬當重
任既展承天之禮宜覃率土之澤可大赦天下改元曰
至德大辟罪已下常赦所不免者咸赦除之其逆賊李

林甫王鉷揚國忠近親合累者不在免限百姓官吏能率親屬去逆歸順者有官加其優獎斬得逆賊父子不問首從當錫茅土別有褒崇其直言極諫才堪牧宰文詞博達武藝絕倫孝悌力田沉淪草澤委所在長官聞薦詣闕自陳者亦聽東官官屬既會昌期合承寵命量加改轉諸色勾徵逋租懸調及官錢在百姓腹內並宜免放靈州改為靈武郡大都督府上縣為望中縣為上官寮等一切便授天下耆壽各賜物五段侍老版授太

守縣令有差各賜物五段諸道百姓委本道採訪使差
郡縣存問四方將士各賜馬一匹六品已下賜物十段
天下寺觀度七人太守並限三考然後轉御史取曾任
郡縣理人官者後可薦用所有彈奏一依貞觀故事官
吏枉法犯贓終身勿齒自古聖帝明王忠臣烈士五嶽
四瀆名山大川並令所在致祭孝子順孫義夫節婦旌
表門閭内外文武官九品已下各賜兩階賜勲兩轉三
品已上賜爵一級

二年十二月戊午御丹鳳樓門下詔曰軒轅有版泉之
戰堯帝有丹水之師湯有葛伯不祀周有獫狁孔熾古
之王者奉若天命違道不敢不正干紀不得不誅日者
逆胡猖狂敢行稱亂朕嗣守鴻業欽承睿圖枕戈嘗膽
撫劍泣血罔不夙夜若涉春冰賴天地疾威社稷憑怒
上皇丕烈萬國永懷因時致討為人請命繇是義夫奮
發回紇籍兵邦圻關輔之士沂隴河湟之衆沙朔羌戍
之騎微盧蠻貊之人萬里雲超四方霧合既張我伐咸

乃一心蠹茲蜂蠆之餘尚負螳螂之力自京南合戰
北追奔百萬摧鋒一戍而定昔夏以有窮之亂克之者
四十年漢以新莽之亂復之者六千日今環周未載氛
禊廓清風振海而波盪雷破山而石裂區宇重闢日月
增輝此皆三靈叶贊累聖垂祉豈予小子能集大勲頃
以先掃宮室奉迎鑿駕紫宸初正黃屋未歸耆老之望
則深庭闈之戀猶積所以自天之澤必奉於承顏作解
之恩尚稽於候命今六龍屆止萬姓昭蘇義本奉親慶

深家國不失舊物與俗惟新宜弘肆眚之典共喜以康之
福可大赦天下常赦所不免者咸赦除之其逆人能自投
降率衆款附反逆殺人并獲逆人其以所部郡縣軍城降
者並加超賞應與安祿山同謀反支黨及李林甫王鉷楊
國忠等一房並不在免限武德開元及蜀郡靈武元從功
臣有亡歿死王事者並加優贈各與子孫一人官乘輿幸
蜀天步多難人心且搖臣節斯見太子太師幽國公韋見
素開府儀同三司內侍監齊國公高力士開府儀同三司

右龍武大將軍頽川郡陳元禮開府儀同三司右龍武大將軍田長文開府儀同三司右龍武大將軍張崇俊右龍武大將軍杜休祥等勇不顧死危能致命或竭誠羽翼仰北辰而環拱或叶契心誓聚東井以全歸疇茲錫社之封以永誓河之義見素加開府儀同三司實封三百戶力士加實封三百戶元禮進封蔡國公實封三百戶長文進封雁門郡公崇俊進封南陽郡公休祥進封馮翊郡公各實封二百戶朕躬行天罰誓兵朔野幸以一旅之衆遂成九

有之師言念經綸豈忘締構銀青光祿大夫尚書右僕射裴
冕識宇冲深體局貞固輸忠佐命肇啟興王開府儀同三
司封冀國公食實封三百戶光祿大夫殿中監同正員判
行軍李輔國志除軍惡忠誠濟危加開府儀同三司殿中
監依前判行軍事封成國公實封五百戶銀青光祿大夫
宗正卿兼工部侍郎李尊義切維城勲叅定國加特進封
鄭國公封二百戶開府儀同三司兼鴻臚卿同正員中軍
都知兵馬使副大使管崇嗣能訓戎律以佐兵權進封鉅

鹿郡公實封二百戶中軍都虞候特進鴻臚卿同正員
李鼎加開府儀同三司進封保定公加雲麾將軍右武衛
大將軍在羽林軍宿衛內供養王競加特進太原縣侯仍
各實封一百戶自寇賊姦宄王師未振瞻言京國尚聚犬
羊廣平王倣循學好古今德孝恭志存邦家誓雪讐耻爰
鞠其旅元戎啓行可封為楚王實封二千戶銀青光祿大夫
尚書左僕射兼武部尚書同中書門下平章事兼靈武大都
府長史單于安北副都護持節充朔方節度使六城水運朔

方管内採訪處置使子儀才光三傑功格十臣克焯皇威載
昌大業加司徒兼尚書左僕射進封代國公食實封二千
戶平章事已下並如故開府儀同三司兼鴻臚卿同正朔
方左廂兵馬事同節度副使姑臧縣伯僕固懷恩進封豐
國公兼實封二百戶開府儀同三司兼右衛金吾大將軍
同正仍充四鎮伊西北庭行軍兵馬使李嗣業履險亡軀
破敵定難兼衛尉卿同正封虢國公食實封二千戶銀青
光祿大夫守司徒兼戶部尚書同中書門下平章事御史

大夫鴻臚卿太原尹北京留守河東節度副大使蘇國公
光弼全德挺生英才間出干城禦侮坐甲安邊可司空兼
六部尚書同中書門下平章事進封魏國公食實封八百
戶開府儀同三司御史大夫兼工部尚書持節充招討西
京并定武威武興平等軍兼關內節度河西隴右伊西四
郡行營兵馬使王思禮養銳先鳴蓄奇後殿可開府儀同
三司行工部尚書兼御史大夫封霍國公實封六百戶光
祿大夫太常侍卿同正兼御史大夫淮南西道節度採訪

使潁川太守米瑱可開府儀同三司兼御史大夫封潁國公
餘如故特進太僕卿南陽太守兼御史大夫權知襄陽事
金鄉縣公魯炤蘊是韜畧副茲臨制可開府儀同三司兼
御史大夫封祁國公仍各食實封二百戶兼京兆尹持節
充京畿在採訪計會招討宣慰處置事崔光遠毀家成國
致命前茅可特進行禮部尚書封鄴國公食實封三百
戶開府儀同三司李光進慎固封守克獻殊勳封范陽
郡公食實封三百戶賢非后不享后非賢罔入社稷之

固必在良臣左相苗晉卿忠不忘君才惟濟世弼成大業保乂王家可特進行侍中封韓國公食實封五百戶
憲部尚書同中書門下平章事李麟蘊德成務含貞軌
物發揮帝業潤色皇猷可金紫光祿大夫刑部尚書同
中書門下三品封褒國公銀青光祿大夫中書侍郎同
中書門下平章事崔圓允釐庶績康濟多難一匡天下
大庇生人可特進行中書令封趙國公食實封五百戶
朝散大夫守中書侍郎同中書門下平章事河南節度

採訪賜紫金魚袋張鎬謀猷惟允綱紀立程總茲戎律
懿是謀府封南陽縣公餘並如故銀青光祿大夫太子
少師房瑄嘗以經術輔道朕躬加金紫光祿大夫少保
嗣虢王巨頃以宗枝居守經邑加光祿大夫御史大夫
越國公峘總兼元戎克寧全蜀可金紫光祿大夫戶部
尚書銀青光祿大夫守吏部尚書郇國公韋陟持衡流
品式序百工可金紫光祿大夫吏部尚書銀青光祿大
夫守禮部尚書李峴饋運周給開物成務可光祿大夫

行御史大夫兼京兆尹封梁國公大中大夫吏部侍郎
賜金紫魚袋蘇震供億蒸徒臨事益辦可銀青光祿大
夫行吏部侍郎其赴蜀郡靈武元從官及在路扈從官
三品已上與一子官四品以下與一子出身六品已上
量與進改功臣將士勲業高者別有處分應見任五品
已上當別與一品階其陣亡人令所在郡縣收骸骨瘞
埋具酒食致祭各與追贈其家給復二載諸郡縣民或
隔絕賊境則困於幽殘或擄宴官軍則弊於賦歛其來

載租庸三分放一其天下百姓應諸色人勾徵及欠負
官物一切放免宜令中書門下簡使即分道宣慰所至
郡縣審問百姓間利害有須釐革處置者一一聞奏其
園苑內有閑廐使總監各據所管地界耕種所收草粟
以備國馬其宮女及狗豹雞鷹鷄之類宜即停減屋宇
車輿衣服器用並宜準式珠玉寶鈿平脫金泥織成刺
繡之類一切禁斷學官即宜精選務令講習簡擇郎官
有堪任太守縣令者委京清資五品已上及郎官御史

聞薦其郡縣官有灼然清白理行尤異百姓中孝悌力
田不求聞達者委採訪使聞奏其有文經邦國學究天
人博於經史工於詞賦善於著述精於法理軍謀制勝
武藝絕倫並任於所在自舉委郡守銓擇奏聞不限人
數其律令格式未折中者委中書門下簡擇通明識事
官兩三人並法官兩三人刪定近日所改百官額及郡
名官名一切依故事頃以上皇在蜀朕以居岐蜀郡宜
改為南京鳳翔宜改為西京西京為中京蜀郡改為成

都府鳳翔府尹以下官寮並依三京名號吳山為吳嶽其祠享官屬並準五嶽故事天柱山老君廟改為啟聖宮五品已上清資官及三品已上官上郡太守父見在無官及官卑並與五品官父母先亡歿者贈一人官祖母亡歿亦賜邑號忠臣事君有死無二烈士狗義雖滅猶存其李愷盧奕顏杲卿袁履謙許遠張巡張介然蔣清龐堅等即與追贈訪其子孫厚其官爵家口深加優賞其内外文武官有枉遭逆賊殺害及身赴朝廷并逃

難山谷其父子兄弟伯叔等為賊捕捉損害及謀反城人言語洩漏因遭殺戮並勘貢聞奏當以追贈天下侍老八十已上版授有差並贈緋魚袋大原久遭逼園給復三載上黨三度被攻給復五載其南陽潁川靈昌睢陽雍丘等郡縣堅壁多時力窮方下絕食尚守情亦可矜各給復三年其好時奉仙兩縣進退禦寇徵求復多各給復三載蜀郡上皇親幸萬乘久居明年租賦宜依常式起後載給復三載良姊張氏既望氣知歸亦當熊

見節可冊為淑妃進封南陽王為趙王新城王僅為彭
王潁川王儻為兗王第九男佺為襄王第十男佖封興
王第十一男傀封祝王第十二男侗封定王淑妃以下
所司擇日即行冊命雖知人之明慙於則哲而收親之
儀蓋所隨時持盈尊師儀王已下各賜五百疋諸長公
主各與一子官嗣王及郡縣主各與一子六品官皇女
等已下及九廟子孫及親等人見在者並與轉改內外
文武官三品已下各加一階應叙三品五品量加減兩

考蜀郡鳳翔扈從從官九品已上賜勲兩轉溥天下賜
醕五日

乾元元年二月丁未御明鳳門大赦詔曰古者父有天
下傳歸於子子有天下尊歸於父有國所以繼統立身
莫若揚親其義遠矣我太上至道聖皇天帝惟皇降衷
敷祐於上允文允武乃聖乃神道合乎乾坤德明於日
月粵若增崇九廟巡謁五陵天子之孝也嚴裡二郊升
中東嶽聖人之表也制禮作樂闡學明刑帝王之業也

戡定多難懷柔百蠻霸王之功也於是乎為而不宰成
而勿居神超象外之光心契合莫之境釋負於小子俾
承於丕構討伐叛逆綏懷四方豈朕所能皆聖皇之訓
也頃者親授寶符載錫美稱顧朕不德以克負荷君父
之命若登於天祖宗之緒恐墜於地一昨與羣臣百寮
庶尹衆士圖惟帝載欽若聖譽自古已來百工垂範文
明濬哲孝友寬仁豈有如我開元之盛也乃稽大典上
徽號曰太上至道聖皇天帝累日誠請不蒙許納至於

數四今茲俯從允膺天休克副人望朕上廼嚴旨曲被
殊私迎春之初承奉嘉命聖皇所賜曰光天文武大聖
孝感皇帝名以制義亦為實賓卑不踰尊是昭物則恭
惟聖造何敢當仁頃以鴻業載昌有虧公議伏以大聖
二字深僭皇猷讓非飾詞言必形泣承順顏色而宸睃
不迴祇膺寵光乃夕惕增厲今惟新景命禮洽於尊親
誕受徽章敬在於順上發生萬物行慶其時孚佑兆人
緩刑斯在宜弘霈澤以布陽和可大赦天下改至德三

年為乾元元年起二月五日已前大辟罪無輕重常赦所不免者咸赦除之其兩京文武官應三司先推勘者本罪中遞減等處分其合赦者三司具條件奏聞自開元已來將相大臣非反逆及犯名教枉法贓罪者流死許其家人以禮收葬其陷在賊境為其殺戮未經追贈公主并郡王嗣王郡主縣主及皇五等已上親被逆賊殺害者各與子孫一人官使其瘞藏亡失骸骨者各招魂葬身死者三品已上各與追贈仍各與一子官五品

已上一子出身六品已下量事追贈其元從聖皇天帝
至成都府文武官五品已上宜與一子官六品已下超
資進改聖皇至成都府後到官及寧州靈州首末扈從
三品已上與一子官五品已上放一子出身情愿廻授
周親及親近亦聽六品已下量與改轉鳳翔府以歸順
前者普恩外加一階車駕出城後任官潛藏不仕逆賊
即與處分唐隆功臣普恩外賜爵一級身亡歿者子孫
一人加一階其諸道節度下將士三品已上與一子官

五品已上放一子出身六品已下量與改轉勲業高者
各委本使聞奏諸道留後將士普恩外賜恩三轉自開
元已來宰輔之家不為逆賊所污者與子孫一人官賊
陷兩京文武常參官及諸州刺史絕脰仰藥不事叛人
為衆所知者量加優贈有脫身賊庭妻子被屠戮者委
所司勘會聞奏其天下孝義門各與一子官為採訪使
具名聞奏量文武處分其左降官非反逆緣坐及犯惡
逆名教枉法盜賊如有親年八十已上及疾患在牀枕

者不堪扶持更無兄弟許其停官終養其流人亦準此
自今已後應有以醫術入仕者同明法例處分天下百
姓今年租庸並放其百司府縣諸色雜供各宜減半其
雜徭役非要切者一切並停其天下州縣有遭逆賊攻
擊堅守不下竟以獲全其官人百姓中有識效灼然為
衆所知者宜令本道使案驗奏聞據狀迹酬其官賞身
亡歿者重加褒贈有父母存者仍與一官及邑號無父
母者與妻子仍令州縣以官物賑恤并量造舍宇使得

安存其州因城陷被賊殺戮殘毀者委本道使勘責取
實各量免其二年租賦自逆賊以來有匹夫匹婦節義
可稱者並旌表其閭墓其流亡戶復業者委本道使與
刺史勾當賑給并與種子犂牛仍免三年租賦内外文
武官三品已上各賜爵一級四品已下及四方通表使
各加一階五品已下有父歿者各賜勲兩轉其刺史上
佐錄事叅軍縣令委中書門下速於諸色人中精加訪
擇補擬判司丞已下宜令所繇先於兩京潛藏不仕逆

賊及固託疾病官中簡擇資考深才堪者銓注續發遣
皇五等已上親及九廟子孫有才學政理委宗正寺揀
擇聞薦其有任偽官及掌兵馬軍將能即來各還本官
仍別優賞其左降官諸色流移配隸安置罰鎮効力之
類亡官失爵解退放歸田里及安祿山反黨緣坐不在
免限李林甫王鉞楊國忠等一房去年十二月十五日
制後所犯並準前制處分

四月甲寅親行享廟之禮乙卯御丹鳳門大赦天下詔

曰朕聞皇天有命皇王受之命之為君孝理為本莫不
欽崇前烈聿修裸享之儀對越上玄式陳郊裡之敬美
其盛德商頌有奏鼓之音告厥成功夏書有錫珪之慶
國之大事實在於斯間者孽胡亂常暴殄天物致圖書
禮樂或阻於干戈宗廟神祇有虧於享祀朕誕受明命
恭行天罰羣妖克殄討鯨鯢以示威王室既寧奉鑿與
而載復太上聖皇天帝功格天地道邁胥庭思凝神於
姑射將釋負於宸宸俾予小子繼承大統夙夜祇懼俯

盡臣子之心親親尊尊庶極於此是用追崇先后建立中宮永言孝思感徽音於父母俾行婦道想釐降于虞嬪情理於是獲申人倫以之攸叙然後執瓚清廟歌五聖之重光燭柴園丘覩百神之受職復修祭禮再備樂章尊祖配天不失舊物今大禮斯舉玄符允答行慶施惠尚屬於陽和出繫挺囚必當於時令思與天下更布惟新宜覃肆眚之恩以洽雍熙之化可大赦天下除反逆之黨緣坐謀殺十惡刦盜臨監主掌自餘一切原免

其餘逆賊元謀及脅從今但歸投並原其罪仍與官賞
其成都府元從聖皇功臣及靈武原從功臣並收兩京
將士京留守諸道節度採訪使普恩外三品已上賜爵
一級四品已上加一階行人賜勲三轉自寇賊以來官
吏百姓中有勞未經酬賞者委所在官長具狀奏聞當
與甄錄天下百姓除正租庸外一切不得別有使役如
緣軍務所要自令和市兵士有尫弱羸老並揀擇放其
長安萬年兩縣各借錢一萬貫每月收利以充和雇勅

其別索物及供諸司并蕃客等左藏雖給價值奏請每引時月宜先給兩縣各五十貫貯於兩市差官專知旋還價值其州府縣門夫勲官並於舊額數減一半其庸丁殘疾人等不須更差其州縣官上什物並以公廨及官人料錢依時價和雇造買不得分配典正其年支口味宜減一半諸使應進鷹狗豹獠等一切並停應緣南郊百司張設有損百姓苗稼者委京兆尹隨損多少陪酬所損錢物便即聞奏百姓中有能行仁義分濟貧窮

免填溝壑賴救恤者具名聞奏當寵以官職鰥寡憐獨
篤疾不能自存及陣亡人家並租免戶州縣隨事優恤
賑給百姓中有事親不孝別籍異財點汙風俗虧敗名
教先決六十配隸磧西有官品者禁身奏聞京官九品
以上許封事極言時政得失朕將親覽用佇嘉謀才有
可觀別當甄錄草澤及卑位之間有不求聞達未經推
薦者一藝已上恐遺俊又令兵部吏部作徵召條目奏
聞錄事叅軍職司糾舉自今已後宜升判司一政以彰

委任國子監學生明經法帖策口試各十並通四已上
進士通三與及第鄉貢明經準常式州縣學生放歸營
農待賊平之後任役常式二王三恪各與一子官內外
文武官三品已上賜爵一級四品已下加一階

十月甲辰上御宣政殿冊成王為皇太子詔曰守器為
重擇賢而立萬國繇其永貞百王以之垂範蓋以重社
稷而奉梁盛也朕纘承洪緒惟懷永圖丕膺皇極既符
域中之大茂建元儲用崇天下之本皇太子倣植性恭

懿因心孝友文武之德克聞於日躋君親之誠實原於天性往以時屬艱阻義扶宗社故能外清玄扈內復皇圖繇是肇啓重華懋昭嘉緒今撰辰斯及冊命攸行宜承繼明之慶俾廣游雷之澤可大赦天下頃者頻興大典累洽殊私率土之間屢經蕩滌猶慮近有冒法或滯狴牢其天下見禁囚徒已下罪一切放内外文武官三品已上者賜爵一級四品已上各加一階五品已上官子為父後者賜勲兩轉頃因國用不足頒賜未周今所

鑄新錢數盈於萬其京官文武五品已上及常叅官六
軍將士東京北留守及諸道節度將士等各賜有差其
唐隆功臣成都元從及朕元從功臣等普恩之外更賜
一爵四品已下更加兩階其在靈州及寧州至鳳翔者
仰所司類例更遞加一等皇親及諸色陪位人各賜勲
兩轉其鴻臚蕃客賜絹一千疋天下義夫節婦孝子順
孫旌表門閭終身不仕京官五品已上各舉忠正孝友
文儒周慎堪任東官官者務取實才不得虛薦今餘寇

未殄有脅在賊中未歸順者一切不以為罪其有受賊
節制能以兵降者酬其封爵且為政之要求賢是急比
令中外薦舉多非實才所以詢事考言登科蓋寡猶慮
崑穴之內尚有沈淪宜令所在州縣更加搜擇其懷才
抱器隱遁丘園以禮徵送如或不赴具以名聞凡與前
詔科目相當一切委内外文武五品已上官有所知者
不限人數任各荐聞如自舉者亦聽於所在投狀有堪
任用不限常資其行人家及羸老單貧鰥寡孀獨已頻

有處分宜令州縣長官倍加優恤應元冊禮職掌要重者及撰冊書昇寶官禮官等普恩之外賜勲兩轉其禮儀使特賜一階副使普恩之外賜爵一級敕文有不該者所司類例奏聞

二年二月壬戌帝遣侍中苗晉卿中書侍郎王璵分錄大理寺御史臺京兆府見禁囚徒已下罪皆免之三月丁亥詔曰古之哲王臨御區夏莫不好生慎罰以理人命故易稱緩死書貴恤刑所以樂時布和奉天育物者

也朕恭守丕緒祇膺皇極順時調氣庶欽若於玄樞肝
食宵衣每憂勤於黃屋頃自獻春之後膏液稍愆言念
人時或稽政本雖離畢之應未獲滂沱而滋萌之漸亦
頻霑沐是用申茲渥澤助彼發生宜崇寬大之典俾達
陽和之氣其天下應合死罪特降從流流已下罪赦免
其事緣反逆造偽頭首情狀難容者所司詳議聞奏其
流移左降該恩合量移者宜令所司即類例處分朕為
人父母義當亭育時有或愆於令物有不遂其生敢懷

自逸之至實受在予之責但以兇徒尚阻戎旅多虞致使黎庶不堪徭役未息雖國家之事休戚當同而君父之誠寧忘愧惻况春農在候田事方興百姓之間固須優恤天下州縣應欠租庸課稅傳馬粟貸糧種子糶糶變稅及營田少作諸色勾徵納未足者一切放免其正義等倉及諸色攤徵亦宜準此其至德二載十二月三十日已前和糶和市并負欠官物及諸色官錢欠利常平義倉欠負五色一切放免州縣百姓頃屬軍興戶口

之間不無流散宜令州縣長官審加勘責且立簿書據
見在戶徵課稅其逃亡者別立文案設法招輯終年類
例以為褒貶如勘責虛望所繇官長並節級科貶其所
繇典正等先決六十仍罰効力其百姓先逃散即能還
者並每季申省給復三年其逃戶有田宅邸店堪充課
稅者宜令所繇即為租賃不得因茲妄有欺隱主到即
却令分付比者不急之務尋已詔停如聞所司未全減
省載求人瘼實切朕懷固當革弊息人勵精為理自今

已後內外不得輒別徵求妄為進奉諸色力役造作非
軍國灼然要急及諸色率稅亦一切並停太常寺音聲
除禮用雅樂外并教坊音聲人等並仰所司疎理使敦
生業非祠祭大祀及宴蕃客更不得輒有追呼其內將
作少監及諸供司丁匠等各仰長官逐要量留餘者並
委御史臺專加糾察如有違犯具錄奏彈宣示中外令
知朕意

三年二月丙子詔曰國之用刑兼在於慎恤王者布澤

亦貴於乘時所以大易陳規必議於獄周官設教導於中興朕躬臨寶位憂念黎元乾乾之心日慎一日况兵戎未息征役尤繁哀此下人無忘夕惕如聞州縣之內多有累囚囹圄之間動淹時序每念納隍之慮常懷解網之仁屬陽春布和品彙咸達宜覃在宥之澤俾叶生成之化其天下見禁囚徒死罪降流流已下一切放免其十惡叛逆及偽造頭首強盜刦殺官吏犯賊枉法等害政既甚在法難容不在此限其諸供司及作曹非切

要外並宜減省京畿諸色和糴一切並停其天下百姓
灼然單貧交不存者緣租庸先立限長行每鄉量降十
丁猶恐編戶之中懸罄者衆限數既少或未優矜其實
不支濟者宜令每鄉量更矜放待資產稍成任依常式
以天下未寧頻申赦令公私庶務優恤蓋多載單宥過
之恩庶及措刑之美宣示中外知朕意焉

上元元年閏四月己卯御鳴鳳門詔曰自古哲王恭承
景命莫不執象以御宇歷時以建元必當上立乾符下

立人極者也朕承累聖之鴻業紹大中之寶位冠孽干紀王師尚勞乾乾之心豈忘鑒寐一物失所每軫納隍之憂萬邦未寧深懷馭朽之懼賴上玄垂福宗廟降靈百辟卿士同心戮力方冀干戈載戢區宇乂寧每勵躬於帝圖常取則於天道屬天人叶紀景象垂文爰遵革故之典將契惟新之命義存更始庶有應於天心澤被無私宜載覃於率土可大赦天下改乾元三年為上元元年閏四月十九日昧爽已前大辟罪已下已發覺未

發覺已結正未結正見禁囚徒罪無輕重常赦不免者
咸赦除之其與逆賊元謀及脅從受驅使懼法來降并
潛藏不出者已頻處分但能歸順赦罪除元惡之外一
無所問其史思明心能改圖束手來款亦當洗其瑕釁
議以勲封内外文武官賜爵各有差其六軍及飛龍閣
廐加賜物其成都靈武元從扈從遍加有差在外諸軍
各加錄賞物陣亡將士優加褒贈行人家口所在賑給
定禍亂者必先於武德拯生靈者諒在於師貞周武創

業克寧區夏惟師尚父寔佐興王况德有可師義當禁
暴稽諸古昔爰崇典禮其太公望可追封為武成王有
司依文宣王置廟仍委中書門下擇古今名将配享并
置亞聖及十哲等享祭之典一同文宣自古百王欽慎
刑法蓋以法者人之命刑者國之權苟或失其科條固
難措其手足頃或奸臣擅命中興不修造次便行哀敬
何在自今已後其有犯極刑者宜令本司依舊三覆庶
平反之際人謂不寃幽明之間理皆無濫又書稱羣望

咸集詩曰祠事孔明爰自遐代尤崇祭祀朕深惟古義
必在至誠苟德之不修則神亦無據故知精誠有感黍
稷非馨而况宋景發言固三徙而可驗漢文深戒為千
載之明徵事可遵行理當變革有司所立秘祝之法或
移於歲或移於人君人之心寧所忍也自今已後削去
此法其中祀下祀并雜祭祀等一切並停其諸應合祭
祀列於常典所用祭科一依古制務從減省以副朕心
又車服以庸有虞盛典威儀以等周禮舊章往屬承平

多歷年所至於公卿列位中外在官多以奢僭為心流
弊成俗宜令所司定王公以下車服產業各詳古制及
令式作節限聞奏自頃戎車未息殘孽猶虞軍史獻功
務陳首級且四海之內孰非王人豈以苟從昏迷陷在
夷戮一朝授首懸彼橐街朕志在好生憫其驅脅其諸
軍所獲首級除元惡之外一切不得傳送又設官以禮
本在安人遞遷之政勞於利物今寰瀛之內兵革未清
加以時或不登物皆踴貴軍儲是急廩稍靡供冗官之

流固甚勞弊其京間司官等有材堪釐務者宜命中書
門下即類例量資歷出授外官王者設教擇賢以理廣
徵鼎穴用副薪樞宜令中外五品已上文武正員官各
舉賢良方正直言極諫一人武藝文才俱堪濟理者亦
任狀舉其或文乏詞策武非騎射但權謀可以集事材
力可以臨戎方圓可收亦任通舉並限制到一月內奏
畢自古明王聖帝名山大川並委州縣長吏擇日致祭
義夫節婦孝子順孫旌表門閭終身勿事

二年正月甲寅詔曰乘時布澤有國之彛訓議獄緩刑
前王之茂典繇是洽其麇卵殷湯弘解網之仁順彼陽
和漢后有錄囚之詔育物施惠抑惟舊章朕纘服鴻業
祇膺寶位何嘗不日旰忘食中夜求衣慮一物之失所
憂四方之未乂雖身居黃屋而志在蒼生今寇孽為虞
征輸未息猶恐提戈釋耒未有厚於人時真棘理梧或
慮盈於幽圉屬三陽啓候萬物遂生宜覃在宥之澤庶
叶維新之令其天下見禁徒囚死罪降流徒以下並釋

放京城宜令中書門下即分往府縣御史臺大理寺即
自親按問疏決訖具狀聞奏諸府州各委所繇長官準
此處分諸色流人及左降官等所繇類例並與量移仍
委中書門下議覆奏取處分其先緣安祿山偽署三司
有名應在流貶者原情議罪負國誠深朕以捨其殊死
竄於荒徼固當與衆共棄長為匪人然皆邦國舊臣嘗
挂纓冕使其終歿裔土永匿慙魂孰若貸以殊私俾令
效節亦準例處分兼委中書門下量輕重類例奏取處

分比緣寇盜之內干戈脅從白刃臨頸胡寧忍決所以
陷於兇黨苟免者多前從詔書頻以該及其史思明將
士及偽署官屬等有東身歸順并率衆來降官爵如初
一無所問以城邑降者仍別加封爵餘兇黨之流亦同
此例天實臨照朕無食言王者設教務農為首今土膏
方起田事將興敦本勸人寔惟政要宜令天下刺史縣
令各於所部親勸農桑百姓中有勤勞耕耘積其菽粟
或贍於閭里或能益軍儲委所繇長吏具狀奏聞當特

與甄賞仍令有司第其高下量酬五品以下官員其百
司及州縣興工力役不急之務一切並停諸軍兵健應
在行營有羸老疾病不任戰陣者各委節度使速揀擇
放還路次州縣量加濟恤諸色步役各令所司減省放
其營農且寇孽未平軍戎當備毗庶之內征賦猶繁朕
所以親帥公卿躬行節儉而詔書屢下蠲免蓋多國計
軍儲取給而已猶欲累加損益以惠黔黎宜委中書門
下勾當令度支使與諸供司一切減省應可蠲免每司

各條件聞奏當使施行

九月壬寅詔曰為人上者與衆守邦自古哲王懼其滿假聰明濬哲罔不在躬文武聖神乃以為號顧予菲薄運屬經綸一旅成師復其舊物聖皇納人壽域遊意道源神器之重傳歸於朕獲守丕業若履春冰敢忘謙冲日益招損欲垂範而自我亦去華而就實其乾元大聖光天文武孝感等尊崇之稱何德以當之以欽若昊天定時成歲春秋五始義在體元惟以紀年更無潤色至

於漢武飾以浮華非昔王之茂典豈永代而為則三代
受命正朔皆殊宗周之王實得天統陽生元氣之本律
首黃鍾之尊制度可行叶用斯在自今已後朕號稱皇
帝其年但號元年去上元之號其以今年十一月為天
歲首便建丑建寅每月以所建為數承天陟后稽古臨
人必繇革故之源方合大中之道風行寓縣澤被無涯
欽承上帝之心申錫蒼生之慶可大赦天下自二年九
月二十一日昧爽已前大辟罪無輕重已發覺未發覺

已結正未結正見繫囚徒常赦所不免者咸赦除之其
十惡五逆及造偽頭首官典犯贓法實難容刑故無小
並不在免限其史朝義若能翻然改圖背逆歸順罪無
所問加以勲封自乾元元年已前開元已來應反逆連
累赦慮節度限所未該及者並宜釋放有官者降資與
官無官者依本色例收叙内外官三品已上賜爵一級
四品五品各加一階六品已下賜勲兩轉成都府及靈
武元從普恩之外三品已下更賜爵一級四品更加一

階六品已下更賜勲一轉眷及勤勞俾其卓叙每以田
功在謹農事惟勤不有司存何成重穀諸州等各置司
田叅軍一人專主農事每縣各置田正二人於當縣揀
明閒田種者允務令勸課國之大事郊祀為先貴其至
誠不美多品黍稷雖設猶或非馨牲牢空多未謂能享
今以玄元孚佑至道為心將臻太和不欲多殺禮樂殊
制孝敬同歸園丘方澤任依常享宗廟時祠但臨時獻
熟用懷明德之馨庶合西隣之祭唐虞之代肇有九州

王者所都文無異制其京兆府河南府太原府三京之
號宜停其鳳翔先為西京亦宜準此所設諫曹欲聞諷
議允副從繩之望須成削橐之書其諫官令每月一上
封事指陳時政得失若不舉職事當別有處分其諸州
別駕可依舊却置每除京官五品已上正員清望官及
郎官御史諸州刺史皆用推荐一兩人以自代仍具錄
行能聞奏觀其所舉以行殿最文武官等賜物各有差
自今已後有隱欺須勾剝者宜勾當年若事連去年亦

任通勾其隔年者不在勾限官典隱藏在腹內不在此
限其氏姓雖得之久遠者與俗諱及隱疾同聲者宜改
與本族望所出大姓自遂穩便名山大川明王聖帝所
在廟祠各委州縣官長虔誠致祭天下侍老先版授者
改與版授未版授者與版授鰥寡孀獨不能存立者委
刺史縣令量加賑恤義夫節婦孝子順孫旌表門閭終
身勿事赦書所未及者各令有司速勘會類例條件
聞奏

元年建卯月

臣欽若曰是去年號稱
月建事具帝五年號門

辛亥朔御鳴鳳門

詔曰惟天為大事之在明惟聖能享承之在德朕託於
人上獲守丕圖思大道之行去鴻名之節文武徽號存
而不稱開統履端建元叶紀美皆有讓言必可陳虔告
玄元致齋清廟恭行舊典展禮南郊百神允懷上帝臨
我升聞之際其亦可言昭事以誠寔膺多福高而不遠
復見其心乃候發生之時用行嚮勸之道場谷出日登
大明於域中泰山起雲遍膏雨於天下君人臨照德澤

周洽布其寬大豈止於茲宜行肆眚之恩益廣萬邦之慶可大赦天下自元年建卯月一日昧爽已前大辟罪已下罪無輕重已發覺未發覺已結正未結正繫囚見徒常赦所不免者咸赦除之其叛逆造偽頭首謀殺故殺并十惡死罪官吏及典正犯贓為蠹既深在法難容並不在赦限其史朝義已下脅從將士及受偽官等棄逆歸順因事立功封賞之外餘無所問其諸色流人及左降官等前後頗有處分並與量移所繇稽遲動厯年

數宜令有司即申明前後制勅節文速勘責類例聞奏
其中外行業夙著情狀可矜久踐朝班曾經任用者委
在朝五品已上清望官及郎官御史於流貶人中素相
諳委為衆所推者各以名薦須當才實其内外文武官
三品已上賜爵一級四品已上各加一階成都府靈武
元從功臣三品已上更賜爵一級四品已上更加一階
朕敬授人時慎徽月令庶無極否以獲休徵自今以後
每至四孟月迎氣之日與百辟卿士舉而行之建辰月

應蕃曠騎宜三分量留一分其餘即放歸營農至建巳
月任依常式諸州刺史縣令及司田叅軍令設法勸課
令其耕種不得失時貧不支濟戶似方圓處置量事借
貸務令存立歲終巡按量其功效便申賞罰諸道貢獻
除馬畜供軍之外其餘鷹鷄狗豹奇禽異獸並不得輒
進五都之號其來自久宜以京兆府為上都河南府為
東都鳳翔府為西都江陵府為南都太原府為北都孝
本天經禮崇國典橫於四海漏及三泉其京資清正員

文官五品已上武官三品已上并兩省供奉官御史諸
州刺史並諸道節度已下三品已上父母亡歿未經追
贈者並量與追贈文武不墜道弘於人務在搜揚俾其
展效其諸道入中有詞學高深兼通政理軍謀制勝明
習韜鈴者委所在刺史揀擇薦京四品已上員文武官
任各舉一人孝子順孫義夫節婦旌表門閭終身勿事
建辰月壬午詔曰元首之義以人為心外有凋傷內懷
慘怛罪歸於己情見乎辭伯禹深泣辜之仁漢皇下哀

痛之詔與理同道惟刑是恤朕志弘覆載運屬艱難思
措大刑俾登壽域風以解愠時當發生國有舊章已懸
書於象魏恩成在省宜釋繫於狴牢其天下見禁囚徒
罪無輕重一切赦免其官典犯賊情雖難恕特從寬典
許以自新並宜納贓放所犯罪左降官等即與量移近
處諸色流人及効力罰鎮人等並即放還其有亡官失
爵亦與收叙比來兵革不息年穀未登百姓流離至於
困弊戰士暴露頗闕乏或先有結聚及有違軍令但

宜改過自效前事捨而不論艱虞以來多冒刑憲道存善貸屢有德音庶其最靈咸自改勵宣示中外知朕意焉

己未又詔曰左降收叙官及流人等今月三日已有處分若準例更待本處文解必恐動經歲年恩不及時殊乖先意宜令所繇計會勘責五品已上及郎官御史俱取中書門下六品已下委兵吏部各詳犯狀輕重量才改轉其本犯非巨蠹曾經清班名行夙著者仰具名銜

聞奏諸色流人等所司簡勘明厯牒所繇州縣軍鎮等
放還流貶人所在身亡者任其親故收以歸葬仍州縣
量給棺槨發遣

寶應元年四月乙丑詔曰上天降寶獻自楚州神明告
厯數之符合璧定妖災之氣總集瑞命祗承鴻休因以
體元叶乎五紀其元年宜改為寶應元年建巳月改為
四月其餘月並為常數仍舊以正月一日為歲首受茲
福應佇以升平因日月之重光布雨雲之渥澤其天下

見禁囚徒罪無輕重并已發覺未發覺已結正未結正
四月十五日昧爽已前一切放免左降官宜即量移近
處流人一切放廻有司更不得輒有類例條件其楚州
刺史并出寶縣官及進寶官量與進改隨進寶官典倅
等各量與一子官宣示中外宜知朕意

冊府元龜卷八十七